

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br: 17/00, 1/05, 11/06, 13/11 i 15/17), a u vezi sa članom 69. stav (1) tačka 33. i članom 78. stav 2. Zakona o izvršenju Budžeta Tuzlanskog kantona za 2022. godinu («Službene novine Tuzlanskog kantona» broj 23/21) Vlada Tuzlanskog kantona na sjednici održanoj dana 15.03. 2022. godine, d o n o s i:

## **P R O G R A M**

### **o utvrđivanju uslova, kriterija i postupaka za raspodjelu sredstava Budžeta Tuzlanskog kantona za 2022. godinu „Podrška povratku prognanih lica“**

#### **I**

Ovim Programom utvrđuje se uslovi, kriteriji i postupak raspodjele sredstava Budžeta Tuzlanskog kantona za 2022. godinu - Podrška povratku prognanih lica (u daljem tekstu Program) u iznosu od 780.200,00 KM (slovima: sedamstotinaosamdesethiljadadvijestotine konvertibilnih maraka).

#### **II**

Program raspodjele sredstava obuhvata:

- pomoć drugim nivoima vlasti u slučaju potreba za hitnim intervencijama u zonama povratka i kolektivnim centrima 400.000,00 KM
- projekti održivog povratka 360.200,00 KM
- sufinansiranje troškova readmisije ranjivih readmisiranih osoba koje se vraćaju po osnovu sporazuma o readmisiji 20.000,00 KM

#### **III**

Sredstva iz tačke II. stav 1. alineja 1. ovog Programa predviđena za „Pomoć drugim nivoima vlasti“ koja realizuje Ministarstvo za rad, socijalnu politiku i povratka TK-a u iznosu od 400.000,00 KM u slučaju potrebe za hitnim intervencijama u zonama povratka i kolektivnim centrima dodjeljivat će se općinama/gradu/udruženju za rješavanje problema u zonama povratka i kolektivnim naseljima gdje borave raseljene osobe.

Uslovi za dodjelu sredstava:

- da se radi o mjesnim zajednicama/naseljima/udruženjima u kojima žive, odnosno, čiji su članovi povratnici ili
- da se radi o kolektivnim naseljima u kojima je potrebna intervencija na infrastrukturnim objektima i objektima kolektivnog stanovanja.

Ministarstvo za rad, socijalnu politiku i povratka (u daljem tekstu: Ministarstvo) će Odlukom definisati visinu donacije po zahtjevu općine/opštine/grada/mjesne zajednice/udruženja za ove namjene.

Uz zahtjev općine/opštine/gradovi/mjesne zajednice/udruženja obavezni su ispuniti osnovne kriterije i dostaviti sljedeću prateću dokumentaciju:

- pismeni zahtjev mjesne zajednice ili naselja/udruženja upućen općini/gradu ili zahtjev općine/grada u ime mjesne zajednice/udruženja,
- saglasnost općine/grada po podnesenom zahtjevu,
- dokaz izdat od općine/grada da se radi o povratničkom naselju ili kolektivnom centru i
- predračun koji se tiče vrijednosti planiranih radova.

Ministarstvo će vršiti odabir korisnika sredstava na osnovu sljedećih posebnih kriterija:

- broj mjesnih zajednica/naselja koji povezuje korisnike projekta,
- broj povratnika/raseljenih lica, korisnika projekta,
- sufinansiranje projekta iz drugih izvora,
- ocjena društvene važnosti projekta.

Ministarstvo donosi Odluku u kojoj će odrediti visinu finansijskih sredstava na osnovu dostavljene dokumentacije. Pri donošenju Odluka Ministarstvo će voditi računa o Zaključku Vlade TK broj 02/1-05-36064/19 od 10.12.2019. godine. Na Odluku Ministarstva Vlada Tuzlanskog kantona daje suglasnost.

Rok za pravdanje utroška odobrenih sredstava utvrdit će se Odlukom o odobravanju sredstava.

#### IV

Sredstva iz tačke II. stav 1. alineja 2. ovog Programa predviđena za „Projekte održivog povratka“ u realizaciji Ministarstva za rad, socijalnu politiku i povratka TK-a u iznosu od 360.200,00 KM bit će raspoređena kao pomoć povratnicima na područje Tuzlanskog kantona i osobama koje su imale status raseljene osobe na području Bosne i Hercegovine, odnosno, izbjeglih osoba iz Bosne i Hercegovine, a vratili se u svoja prijeratna prebivališta.

Sredstva su namjenjena za realizaciju samostalnih projekata u iznosu do 6.000,00 KM po raseljenoj osobi/izbjeglici.

Odabir korisnika vršit će Ministarstvo putem javnog poziva.

Uslovi:

- popunjen prijavni obrazac,
- da se radi o povratniku,
- da je imao status raseljene osobe na području Bosne i Hercegovine prije povratka u prijeratno mjesto prebivališta na područje Tuzlanskog kantona ili status izbjegle osobe,
- da je priložena projektna ideja za koju se traži donacija i
- da povratnik i članovi njegovog domaćinstva u zadnjih 5 godina od dana objave Javnog poziva u 2022. godini nisu primili donaciju na ime održivog povratka od strane resornog Ministarstva TK.

Kriteriji na osnovu kojih se vrši bodovanje podnesenih zahtjeva, utvrdit će se Pravilnikom o utvrđivanju uslova, kriterija i postupka za odabir korisnika donacija u finansijskim sredstvima na ime održivog povratka koji će nakon donošenja ovog Programa, donijeti Ministar za rad, socijalnu politiku i povratak u Vladi Tuzlanskog kantona, a na isti saglasnost daje Vlada Tuzlanskog kantona. Broj korisnika koji mogu dobiti finansijska sredstva je maksimalno do pet (5) po jednoj općini/gradu. Ukoliko nema dovoljan broj prijava iz drugih općina/opština/grada, maksimalan broj donacija po jednoj općini/opštini/gradu se može povećati srazmjerno sredstvima koja su ostala neraspoređena srazmjerno broju uredno podnesenih prijava po općini/opštini/gradu.

#### V

Sredstva iz tačke II. stav 1. alineja 3. predviđena ovim Programom mogu koristiti gradovi i općine Tuzlanskog kantona, koji uz zahtjev za sufinansiranje troškova readmisije ranjivih readmisiranih osoba koje se vraćaju po osnovu Sporazuma o readmisiji, prilože validne dokaze da su izvršile readmisiju ranjive readmisirane osobe ili više njih koji se vraćaju po osnovu Sporazuma o readmisiji.

Pod validnim dokazima smatraju se:

1. Zahtjev za sufinansiranje troškova,
2. Narativni izvještaj grada ili općine o izvršenoj readmisiji na području Tuzlanskog kantona i
3. Validni računi kojima se dokazuju nastali troškovi pri readmisiji ranjive readmisirane osobe ili više njih koji se vraćaju po osnovu sporazuma o readmisiji, navedeni u narativnom izvještaju.

Ministarstvo će odrediti visinu finansijskih sredstava na osnovu dostavljene dokumentacije. Sredstva za troškove readmisije ranjivih readmisiranih osoba, koristit će se na osnovu Odluke Ministarstva o sufinansiranju troškova readmisije ranjivih readmisiranih osoba koje se vraćaju po osnovu sporazuma o readmisiji u 2022. godini. Ministarstvo će donositi Odluke o sufinansiranju troškova readmisije po ovom Programu, a po prispjelim zahtjevima gradova i općina sve do potpunog utroška sredstava predviđenih Programom.

## VI

Sredstva za namjene iz tačke II ovog Programa utvrđena su u 23 razdjelu Budžeta Tuzlanskog kantona za 2022. godinu, glava 04, potrošačko mjesto 0001 – Podrška povratku prognanih lica, ekonomski kod:

- za sredstva iz tačke II. stav 1. alineja 1. - 615100 - Kapitalni transferi drugim nivoima vlasti,
- za sredstva iz tačke II. stav 1. alineja 2. - 614200 - Tekući transferi pojedincima i
- za sredstva iz tačke II. stav 1. alineja 3. - 614 100 - Tekući transferi drugim nivoima vlasti.

## VII

Za izvršenje ovog Programa zadužuje se Ministarstvo za rad, socijalnu politiku i povratak i Ministarstvo finansija Tuzlanskog kantona u skladu sa odredbama Zakona o izvršenju Budžeta Tuzlanskog kantona za 2022. godinu.

## VIII

Program stupa na snagu danom donošenja i bit će objavljen u „Službenim novinama Tuzlanskog kantona“.

**BOSNA I HERCEGOVINA**  
**Federacija Bosne i Hercegovine**  
**Tuzlanski kanton**  
**VLADA**

**PREMIJER KANTONA**  
**Irfan Halilagić**

**Broj: 02/1-11-2217/22**  
**Tuzla, 15. 03. 2022. godine**

## OBRAZLOŽENJE

Na osnovu člana 19. Zakon o raseljenim osobama i povratnicima u Tuzlanski kanton i izbjeglicama iz Bosne i Hercegovine („Službene novine Tuzlanskog kantona“ br. 2/06 i 15/11) Ministarstvo za rad, socijalnu politiku i povratak je predložilo u Budžetu za 2022. godinu, a Vlada i Skupština Tuzlanskog kantona prihvatile budžetsku stavku za finansiranje pomoći za sanaciju putnih komunikacija, odnosno, hitnih intervencija u kolektivnim naseljima gdje borave raseljene osobe, finansiranje projekata održivog povratka i sufinansiranje troškova koji će nastati u procesu readmisije ranjivih kategorija u BiH a koji su imali mjesto prebivališta na području Tuzlanskog kantona u iznosu od 780.200,00 KM.

Prema iskazanim potrebama za hitne intervencije na oštećenoj i dotrajaloj infrastrukturi u zonama povratka i objektima u kolektivnim naseljima koji su neophodni za pružanje minimuma uslova za smještaj raseljenih lica, predlažemo iznos sredstava od 400.000,00 KM, za koji smatramo, na osnovu dosadašnjih prispjelih aplikacija, da će zadovoljiti potrebe općina/gradova, odnosno MZ u 2022. godini.

Na osnovu potreba koje iskazuju općine/gradovi u kojima traje proces povratka, ličnih obraćanja povratnika, prispjelih aplikacija na raspisane javne pozive, (u prethodnoj godini 219 aplikacija), uslova u kojima žive povratnici, a koji su identifikovani na licu mjesta na terenu, neosporna je potreba za što većim ulaganjem u finansiranje projektnih ideja povratnika za održivi povratak u 2022. godini.

Za pomoć u realizaciji projekata održivog povratka u 2022. godini predlažemo 360.200,00 KM. U periodu od 2001. godine do 2022. godine putem ulaganja u ove aktivnosti na područja TK-a i RS-e, dodijeljena su finansijska sredstva u iznosu 8.054.283,00 KM čime je pružena pomoć za 1.516 porodica koje su se vratile u prijeratna mjesta boravka.

Na osnovu Sporazuma između Europske zajednice i Bosne i Hercegovine o readmisiji osoba koje borave bez dozvole („Službeni glasnik BiH - Međunarodni ugovori“, br. 13/07) i drugih bilateralnih sporazuma o readmisiji, Strategije za prihvata i integraciju BH državljana koji se vraćaju po osnovu sporazuma o readmisiji, Protokola o postupanju nadležnih organa u prihvatu, propratu i privremenom zbrinjavanju ranjivih readmisiranih osoba koje se vraćaju po osnovu sporazuma o readmisiji na koji je Vlada TK dala saglasnost, Ministarstvo za rad, socijalnu politiku i povratak Tuzlanskog kantona je predložilo u Budžetu za 2022. godinu, a Vlada i Skupština Tuzlanskog kantona prihvatile budžetsku stavku za sufinansiranje troškova koji će nastati u procesu readmisije ranjivih kategorija u BiH a koji su imali mjesto prebivališta na području Tuzlanskog kantona, u iznosu od 20.000,00 KM.

Ovaj segment u oblasti povratka, smatramo vrlo ozbiljnim problemom u budućem periodu.

U skladu sa principom dobrovoljnosti članom 3., Protokola o postupanju nadležnih organa u prihvatu, propratu i privremenom zbrinjavanju ranjivih readmisiranih osoba koje se vraćaju po osnovu sporazuma o readmisiji, a u vezi sa članom 12. ovog Protokola smatramo osnovanim i neophodnim izdvojiti navedeni iznos za sufinansiranje troškova koji će moguće nastati u procesu readmisije ranjivih kategorija u BiH za 2022. godinu.

U prilog našem prijedlogu navodimo da je do sada na područje TK-a na godišnjem prosjeku readmisirano oko 40 osoba za čije zbrinjavanje su lokalne zajednice i nadležno državno ministarstvo finansirali troškove nastale u prosjeku, po jednoj osobi, u iznosu od 500,00 KM, a naša projekcija za tekuću godinu je moguće oko 40 osoba, te smatramo realnim traženi iznos od 20.000,00 KM za 2022. godinu.

Navedeni iznos bi se koristio za sufinansiranje slijedećih konkretnih troškova koji bi nastali na osnovu readmisije lokalnih/općinskih timova za readmisiju: upotreba saniteta (u slučaju potrebe), dnevnice za vozača saniteta, ljekara, obezbjeđenja i drugih neophodnih osoba u zavisnosti od samog slučaja. Za slučaj potrebe uključenja Centra za socijalni rad troškovi vozača, goriva i dnevnice osoba angažovanih u timu, za slučaj potrebe pravovremenog smještaja, koji je obavezan u trajanju od 6 mjeseci, troškovi električne energije i ogrijeva, a po potrebi i kirije za stanarinu, za slučaj da lice nije osigurano eventualni troškovi liječenja, troškovi izdavanja osobne dokumentacije ako je osoba ne posjeduje i drugi troškovi u zavisnosti od samog slučaja. Sve nastale troškove bi registrovao lokalni Tim za readmisiju koji bi specifikaciju nastalih troškova dostavio Ministarstvu za rad, socijalnu politiku i povratak, a Ministar bi u skladu sa raspoloživim sredstvima Odlukom odobrio finansijska sredstva koja bi bila uplaćena na račun općine/grada koja je realizovala readmisiju.

Budući da su sredstva za ove namjene obezbjeđena u 23 razdjelu Budžeta Tuzlanskog kantona za 2022. godinu, glava 04, potrošačko mjesto 0001, predlažemo Vladi Tuzlanskog kantona da donese Program kao u prijedlogu.

## **OBRADIVAČ**

**Ministarstvo za rad, socijalnu politiku i povratak TK-a**